



Attaveqarnermut, Avatangiisinut Aatsitassanullu Naalakkersuisoq
Landsstyremedlem for Infrastruktur, Miljø og Råstoffer

Josef Motzfeldt
Inuit Ataqaatigiit sinnerlugit Inatsisartunut ilaasortaq

CO₂-mik aniatitsineq pillugu § 36 naapertorlugu apeqquteqaat

Apeqquteqaatinnut 16. april 2009-meersunut tunngatillugu imatut ilisimatitsissuteqarsinnaavunga.

26. marts 2009

Postboks 909
3900 Nuuk
Oq/tel +299 34 54 00
Fax +299 32 54 10
aan@gh.gl
www.nanoq.gl/aan

1. Kalaallit Nunaanni illoqarfiit tamakkerlugit nunallu immikkoortuini piffinni assigiingitsuni taamaaqataanni ukiumut 3000 tons sinnerlugit CO₂-mik aniatitsisartut pillugit Naalakkersuisut nassuiaateqaqqullugit kissaatigineqarpoq. Tamatumunnga ilanngullugit nasuiaatigeqquneqarput nunami sumiiffiit, sulissiveqarfiit/suliffeqarfiit aqqi sumiiffiilu, ukiullu kingulliit pingasut CO₂-mik qanoq annertugisumik silaannarmut aniatitsisimanersut.

CO₂-mik aniatitsineq pillugu paasissutissat pissarsiarineqarsinnaasut Nukissiuuteqarneq pillugu naatsorsukkani, Naatsorsueqqissaartarfimmit, <http://www.stat.gl/> suliarineqarsimasuni takuneqarsinnaapput.

2. CO₂-mik aniatitsinerup millisarnissaanut Kalaallit Nunaata pisussaaffii eqqarsaatigalugit, Naalakkersuisut politikikkut suut anguniagaraat?

Apeqquteqaatini oqaatigisattut UPA 2009-mi gassinik silaannarmik kissakkiartortitsisartunik aniatitsineq annikillisinniarlugu suliniutissat Naalakkersuisut saqqummiutissavaat. Annikillisitsiniarluni suliniutissat Kalaallit Nunaata qanoq iliorluni CO₂-mik aniatitsinermik annikillisitsisinnaaneranut Naalakkersuisut takorluugaannik ersersitsisussapput. Kisianni aamma illit oqaatigisattut, 1990-imut naleqqiullugu 8%-imik appaanissaq 2012-imi anguneqassappat, annikillisitsiniarluni suliniutissat Kalaallit Nunaata CO₂-mik aniatitsinermik annikillissutissatut siunnerfigisaasa 54%-iinnaannik annertussuseqarput. Sinneruttut 46%-iusut qanoq iliorluni anguneqassanersut maannarpiaq Naalakkersuisut isumaliutigaat. Tassalu 46%-it sinneruttut qanoq iliorluni anguneqassanersut maannakkut suli oqaatigineqarsinnaangilaq.

3. Ungasinngitsukkut Aningaasaqarnermut Naalakkersuisup ilisimatitsissutigaa, aatsitassarsiortut CO₂-mik pisinissaat Landskarsimit akilerneqassasoq. Taamaattoqassappallu aatsitassarsiorniarluni pilersaarutaasuni Tunumi, nunatta kujataanni qeqqanilu ukiuni aggersuni qanittumi piviusunngussappata, qanoq annertutugisumik aningaasartuutaassappat?

Aatsitassanut Ikummatissanullu Pisortaqarfiup ilisimatitsissutaasa kingulliit takutippaat, 2012 nallertinnagu aatsitassarsiornernik nutaanik pilersitsinerup

malitsigisaanik CO₂-mik aniatitsineq annertuumik qaffannaviangitsoq. Kyotomi isumaqatigiissut naapertorlugu piffissaq pisussaaffeqarfiusoq 2012-imi naasussaavoq, taamaattumillu Kyotomi isumaqatigiissutip atuunnerata nalaani aatsitassarsionernik nutaanik pilersitsinerup kingunerisaanik CO₂-mik aniatitassanik annertuumik pisinissaq pisariaqartussaangilaq. Kyotomi isumaqatigiissutip taartissanik nunat tamat akornanni suli isumaqatigiittoqanngimmat, 2012-ip kingorna CO₂-mik aniatitassanik pisinissaq pisariaqartinneqassanersoq oqaatigineqarsinnaangilaq. Tassalu Kalaallit Nunaat isumaqatigiissummut nutaamut ilanngutissappat, Kalaallit Nunaanni aatsitassarsionernik nutaanik pilersitsinerup kingunerisaanik CO₂-mik aniatitassanik pisinissamut aningaasat qanoq amerlatigisut atorneqassanersut oqaatigineqarsinnaangilaq.

4. Naalakkersuisut qanoq nalilippat, avataanit aningaasaliiumasunut piumasarineqassappat, CO₂-mik pisinissamut ingerlatseqatigiiffiit nammineq pisinertik aningaasartuutigissappatigik?

CO₂-mik aniatitassanik pisisoqassappat aningaasalersuisinnaaneq pillugu Naalakkersuisut suli aalajangigaqanngillat. Tassalu nunani allani ingerlatseqatigiiffiit imaluunniit nunap iluani ingerlatseqatigiiffiit CO₂-mut akileraarummik assigisaannilluunniit akiliisinneqartassanersut suli aalajangerneqanngilaq. Matumanili ingerlatseqatigiiffiit amerlanersaasa CO₂-mut akitsuutit assigisaalluunniit aningaasartuutaanerusussatut isigisussaammatigit tamatuma eqqumaffigineqarnissaa pingaaruteqarpoq. Nunani allani ingerlatseqatigiiffiit Kalaallit Nunaanni pilersitsinissamut ingerlatsinissamullu aningaasartuutissaasa amerlineqarnerat, suliffeqarfiit suli aminnik nunani allani aningaasartuutikiffiunerusunut nuussinerannik kinguneqarsinnaavoq.

Apeqqummut 3-mut paasissutissiissutigineqartutut, Kyotomi isumaqatigiissummi piffissap pisussaaffiusup 2012-imi naanissaata tungaanut annertuumik aningaasaliinissap pisariaqartinneqarnissaa naatsorsuutigineqanngilaq. Kyotomi isumaqatigiissutip taartissaa qanoq isikkoqassanersoq, tassanilu pisussaaffiit Kalaallit Nunaannut qanoq kinguneqassanersut ilisimaneqanngilaq.

5. Qanoq annertutigisumik akisussaaffigalugit sakkutooqarfimmi Pituffimmi CO₂-mik aniatitsisoqarnerasoq Naalakkersuisut ilisimasaqarpat? Pituffimmi CO₂-mik aniatitsineq kikkut naatsorsuutaanni ilaappat, Danmarkip, imaluunniit Kalaallit Nunaatta?

Pituffimmi CO₂ aniatinneqartoq qanoq annertutiginersoq Naalakkersuisut ilisimangilaat. Pituffik amerikamiut sakkutooqarfigimmassuk, tassani CO₂ aniatinneqartoq kalaallit danskilluunniit CO₂-mut naatsorsuutaannut ilaasussaangillat.

Ikinngutinnersumik inuulluaqqusillunga

Kim Kielsen